

Sektor perbankan perlu tangani kenaikan kos

KUALA LUMPUR 4 Jan. - Sektor perbankan dijangka akan melalui persekitaran yang lebih mencabar pada tahun ini terutama impak daripada pengurangan pendapatan boleh guna bersih rakyat akibat kenaikan kos sara hidup.

Ketua Eksekutif Bank Simpanan Nasional (BSN), Datuk Adinan Maning berkata, antara kesan yang boleh dilihat termasuklah prestasi perniagaan yang kurang bermaya berikutan kadar pertumbuhan yang tidak berdaya dan kemungkinan besar timbul ketidakbolehan meminjam membayar hutang (NPL).

Katanya, persaingan yang sangat hebat di antara bank-bank juga akan meningkat dan memberi kesan besar khususnya terhadap kadar keberuntungan sektor perbankan.

"BSN juga menjangkakan bahawa tahap persaingan di dalam sektor perbankan akan semakin tinggi terutama jika 'bankability' rakyat serta sektor korporat turut terjejas sekali gus memberi impak kepada aktiviti-aktiviti utama perbankan seperti pinjaman dan deposit.

"Di samping itu, sektor perbankan perlu menangani isu kos perniagaan yang dijangka naik dan

harus ditangani melalui kadar keberkesanan keseluruhan operasi perbankan memandangkan persaingan yang tinggi dalam mengejar pinjaman dan deposit juga akan memberi tekanan kepada margin perniagaan dan menyebabkan keberuntungan sektor perbankan terjejas," katanya kepada *Utusan Malaysia* di sini hari ini.

Minggu lalu, Laporan Pemantauan Ekonomi Malaysia oleh Bank Dunia mengunjurkan pertumbuhan ekonomi Malaysia akan kekal pada 4.7 peratus pada 2015 dan merosot kepada 4.5 peratus pada 2016, prestasi yang mencerminkan kelembapan permintaan domestik pada 2015 berikutan keadaan fiskal lebih ketat yang dijangka berterusan pada 2016 dan 2017.

Pertumbuhan ekonomi dunia secara amnya diramalkan akan melalui satu perjalanan yang lebih mencabar pada tahun depan disebabkan terutamanya harga minyak dunia yang lebih rendah berbanding sebelum ini, kadar pertumbuhan yang rendah dalam kalangan ekonomi-ekonomi terbesar dunia di China dan Eropah serta ketidakpastian pasaran kewangan dunia.



ADINAN MANING